

## In Billed noch Kantorin un Singmädle

Billed is eeni der weniche Banater Ortschaften, in dene noch bei jeder Mess die Orgel gspiltt werd un de Kerchechor singe tut. Brunhilde Klein is seit Johre die Billeder Kantorin. Sie hat mer verzählt, dass se des freiwillich un aus Spass am Musiziere macht. Als Kind hat se Akkordeon spille gelernt. Un wie dann ufmol die Billeder Kerch ohne Kantorin gstann hat, hat ihre Familie uf se ingered, sie soll des Amt doch iwerholle.

Derhem hat die Bäsl Brunhilde dann anfang uf eem Fussharmonium zu iewe. Zuerscht hat se sich jo Note verschaffe misse. Zwar hat se die Kerchelieder alli singe kenne. Doch ach uf der Orgel spille un derzu de Kerchechor leite, des is nit so eenfach. Doch so staat un staat sin die Singmädle, derbei sin ach Studentinne, die am Wucheend aus Temeschwar hemkumme uf Billed un mitmache, zammkumm. Es muss geprobt gin, weil es gin nit dor deitschi sundern ach rumänischi Kerchelieder gsung. De Chor singt unser scheeni Messlieder, kennt alli Marienlieder, die frieher im Banat gsung gin sin. Sogar bei Hochzeite un Kindstaafe begleitet de Billeder Kerchechor die Mess mit scheenem Gsang.

## E beliebte Kantor

Es is noch gar nit so lang her, do han ich uf der Eingangstier der Herz-Jesu-Kerch in der Temeschwarer Elisabethstadt e Plakat bemerkt. Druf war e Orgelkonzert angsaat. Es war an eem Samschtach Owet, wie ich mich uf de Wech dorthin gemacht han. So staat un staat hat sich die Kerch mit Leit gfillt un alli han andächtich dere Orgelmusich gelauscht. Es war e stark scheenes Konzert mit Sopran- un Barritonstimme. Ich han weder de Organist noch die Sänger gekennt. Doch wie des „Ave Maria“ in meh Versione zu Gheer kumm is, do is mer wahrhaftich Gänsehaut iwer de Buckl geloff. Ich hätt stundelang dorte hucke un horche kenne. Noh annerthalb Stund war es Konzert rum, alli Leit han sich rumgedreht, also mitm Gsicht geger de Chor, es Plätsche hat ke End holle wille.

Wie ich nausgang sin, gsiehn ich jo, dass die Leit nit die Trappe nunergehn, sie sin an der Tier, die wu zum Chor nuffiehr, stehngeblieb. Manchi han Blume ghat, anri han unernaner vum Alex gered. Weil ich jo nit gewisst han, wer des is, han ich halts gfroot. Un e Bäsl hat mich ganz erstaunt angeschaut un saat: „Ihr wisst nit, wer de Alex is? Der war doch johrelang Kantor bei uns in der Elisabethstadt un is jetz e beriehmte Organist in Deutschland. Mir wille ne begriesse un beglickwünsche, wille em saan, dass mer ne nie vergesse kenne!“